

Mid-Day Dogri News Bulletin, 12th July 2024

समे – 12:25

<><><><><><>

ECI-SSR Meet

भारतीय चुनां आयोग नै जम्मू कश्मीर च मतदाता सूचिएं दी नजरसानी लेई चलाई जा'रदी कम्मं कारवाइएं दा जायजा लैता। इस बारे जायजा सारे जिला चुनां अधिकारिएं दी बैठक च लैता गेआ। एह बैठक वीडियो कांफ्रेंसिंग राएं लग्गी ही। आयोग नै 21 जून गी हरियाणा, झारखंड, महाराष्ट्र ते जम्मू कश्मीर च मतदाता सूचिएं गी ताजा तरीन बनाने लेई पैहली जुलाई तरीक गी क्वालीफाई तरीक मुकरर कीता हा। मतदाता सूचिएं दी नजरसानी आला कम्म जारी ऐ। जेहदे च घर-घर जाइयै सूचिएं दी तस्दीक करना, बीएलओ राएं तस्दीक होना, मतदान केन्द्रें गी परतियै नमें सिरिया ठीक करना, मतदाता सूचिएं च चीजां दररुस्त करना, फोटू लग्गे दे मतदाता पंछान कार्ड, बगैरा आला कम्म जारी ऐ। इस दरान ब्लाक सतह दे मतदाता, ईआरओ, एईआरओ, सियासी पार्टिएं कन्ने जुड़े दे मामले ते होर केई मामलें दी स्थिति दा जायजा लैताप गेआ। इस बैठक च जम्मू कश्मीर दे मुख् चुनां अधिकारी पी.के.पोले ते होरने दुए सरबंधी अफसरें हिस्सा लैता। अदालतै 2023 च जम्मू कश्मीर च चुनां करोआने लेई 30 सितम्बर 2024 दी समें सीमा तैह कीती ही। मतदाता सूचिएं दी नजरसानी आला कम्म जारी ऐ ते मगरा खीरी सूचि 25 जुलाई 2024 गी प्रकाशित कीती जाग। एहदे पर दावे ते ऐतराज दर्ज करोआने लेई 25 जुलाई थमां 9 अगस्त बश्कार दा समरं तैह कीता गेआ ऐ।

<><><><><><>

Amarnath Yatra

श्री अमरनाथ जी दी यात्रा लेई जम्मू दे भगवती नगर आले आधार शिविर थमां 4 ज्हार 4 थमां बद्ध श्रद्धालुएं दा इक होर जत्था घाटी लेई रवाना होआ। आकाशवाणी जम्मू संवाददाता दी रिपोर्ट मूजब एह जत्था बडलै 165 गड्डिएं दे काफले च सख्त सुरक्षा बंदोबस्तें हेठ रवाना होआ। कुल 6 4 ज्हार 4 सौ 34 श्रद्धालुएं चा 2 ज्हार 713 पहलगाम लेई जिसलै के 1 ज्हार 721 बालटाल लेइ रवाना होए। अज्ज आले इस जत्थे गी मलाइयै जम्मू दे भगवती नगर आले आधार शिविर थमां यात्रा करने आले श्रद्धालुएं दी गिनतरी 81 ज्हार 644 तगर पुज्जी गेइ ऐ। यात्रा शुरू होने थमां लेइयै अजें तगर 2 लक्ख 66 ज्हार 955 श्रद्धालु बाबा बर्फानी दी गुफा

च मत्था टेकी चुके दे न। 52 दिनें तगर चलने आली एह यात्रा 29 जून गी शुरू होई ही ते 19 अगस्त गी रक्खड़ पुन्नेआ आले दिन सम्पन्न होई जाग।

<><><><><><>

Agniveer

केन्द्रीय बल साबका अग्निवीरें आस्तै 10 फीसद आरक्षण लागू करोग। अग्निवीर योजना पर बैहस दे चलदे केन्द्रीय बलें घोषणा कीती ऐ जे ओह साबका अग्निवीरें आस्तै 10 फीसद आरक्षण लागू करोग। सीमा सुरक्षा बल, केन्द्रीय रिजर्व पुलस बल केन्द्रीय औद्योगिक सुरक्षा बल ते सशस्त्र सीमा बल जनेह केन्द्रीय बलें दे प्रमुखें आखेआ जे साबका अग्निवीरें दी उमर च छूट होग ते उंदे आस्तै कोई बी शारीरिक जांच सरबंधी परीक्षा बी नेई होग। सीआईएसएफ दी महानिदेशक नीना सिंह होरें आखेआ जे गृह मंत्रालय नै साबका अग्निवीरें दी भर्ती सरबंधी इक बड्डी गैह पुट्टी ऐ। मीडिया कन्नै गल्लबात करदे होई उनें आखेआ जे सीआईएसएफ च इस भेठा सारे लोडचदे इंतजाम कीते न। उनें आखेआ जे कांस्टेबल दी भर्ती च साबका अग्निवीरें गी 10 फीसदी आरक्षण दित्ता जाग ते उनेंगी शारीरिक परीक्षा बी नेई देना होग।

<><><><><><>

CBI-NEET Kingpin Arrest

सीबीआई नै राकेश रंजन उर्फ रॉकी नांह दे व्यक्ति गी गिरफ्तार कीता ऐ जेहड़ा मन्नेआ जा'रदा ऐ जे नीट पेपर लीक मामले दा सरगना ऐ। इस आरोपी गी 10एं दिनें लेई सीबीआई दी हिरासत च भेजेआ गेआ ऐ। ओह इस जालसाजी दे इक होर प्रमुख व्यक्ति संजीव मुखिया कन्नै बी जुड़े दा ऐ जेहड़ा दऊं दहाकें थमां घोटाले च शामिल ऐ ते फरार बी ऐ। हुन रॉकी दी गिरफ्तारी कन्नै सीबीआई गी अपनी जांच च मदाद मिली सकदी ऐ। जांच अजेंसी नै हुनै तगर झारखंड दे हजारीबाग दे इक स्कूल दे प्रिंसिपल ते वाईस प्रिंसिपल सनें 12 लोकें गी गिरफ्तार कीता ऐ। सीबीआई ते बक्ख-बक्ख राज्यें दे पुलस बल इस गोरखधंधे दी जांच करे करदे न जेहदे च नीट जनेह मतेयानें च पर्चा-लीक करना बी शामिल ऐ। सीबीआई नै हुनै तगर 6 एफआईआर दर्ज कीतियां न।

<><><><><><>

Ramban Social Welfare

समाज कल्याण मैहकमा रामबन आस्सेआ बक्ख-बक्ख समाज कल्याण आली सेवाएं प्रति जागरूकता फैलाने लेई व्यापक तपाशी अभियान चलाया गेआ। एहदा मकसद लोकें गी इंदिरा गांधी राष्ट्रीय वृद्ध अवस्था पेंशन स्कीम, समग्र समाजी सुरक्षा सरबंधी स्कीम, चाईल्ड हैल्पलाइन, भारतीय न्यांह संहिता ते महिलाएं गी सशक्त बनाने लेई कम्म कारवाइएं बारे दस्सेआ दसाया गेआ। जिला समाज कल्याण अधिकारी होरें आईएसएसएस ते राष्ट्रीय समाजी सहायता प्रोग्राम बारे दस्सेआ दसाया। इंदा मकसद बुर्जुग, विधवा ते शारीरिक तौर पर अक्षम दिव्यांग लोकें गी माली सहायता उपलब्ध करोआना ऐ। इस दरान लोकें गी एह स्कीमां हासल करने लेई केहू करना लोडचदा, कौन एहदे लेई योग्य लाभार्थी ऐ, दरखास्त देने दी प्रक्रिया ते होरने तौर तरीके बारे बी दस्सेआ गेआ। बच्चें आस्तै चालू चाईल्ड हैल्पलाइन बारे बी दस्सेआ गेआ। जेहूडी बच्चें दे कल्याण लेई हर दिन कम्म करदी ऐ। एहदे राएं बच्चें गी बचाने ते उनेंगी मदद उपलब्ध करोआई जंदी ऐ। लोकें गी आखेआ गेआ जे ओह इस हैल्पलाइन राएं बच्चें कन्ने होने आले माड़े बरताह जां उंदी सुरक्षा सरबंधी कुसै समस्या बारे राबता करी सकदे न।

<><><><><><>

Sarthal Swachta Abhiyan

स्वच्छ भारत अभियान तैहतइक महत्वपूर्ण गैह पुट्टदे होई जिला प्रशासन किशतवाड़ आस्सेआ सरथल देवी प्रबंधन ट्रस्ट दे सैहयोग कन्ने साफ सफाई आली इक मुहिम सरथल देवी मंदर च चलाई गई। इस कार्यक्रम दी अगुवाई ते दिक्ख रिक्ख किशतवाड़ दे डिप्टी कमीशनर होरें कीती। एह साफ सफाई आली मुहिम सलाना श्री सरथल देवी यात्रा 2024 दे सरबंधै च ही।फ एहदा मकसद यात्रा पर औने आले श्रद्धालुएं गी साफ सुथरा माहौल उपलब्ध करोआना ऐ। इस स्वच्छता अभियान च म्यूनिसपल्टी किशतवाड़ दे अमले, आंगनवाड़ी कार्यकर्ताएं, मकामी लोकें हिस्सा लैता। इस दरान उत्थें मजूद लोकें गी साफ सफाई दे महत्व बारे जानकार बनाया गेआं उनेंगी मंदर दे आले दुआले साफ सफाई बनाई रखने लेई आखेआ गेआ ते गंदगी फैलाने थमां बचने लेई जागरूक कीता गेआ।

<><><><><><>